

四庫全書

史部

欽定四庫全書

史部

欽定八旗通志卷

一百九十五至
一百九十六

欽定四庫全書

欽定八旗通志卷一百九十五

人物志七十五

大臣傳六十一

漢軍正黃旗二

金世德

耿昭

田文鏡

李繩武

楊魁

志 李林隆

李輝祖

楊琳

金世德

金世德遼東鐵嶺衛人隸正黃旗漢軍兵部侍郎

維城子順治九年由廕生補內院博士十二年遷

侍讀十四年改吏部員外郎十八年遷兵部郎中
康熙四年授通政司右通政六年轉左七年正月
晉都察院左僉都御史四月授左副都御史五月
疏言近例督撫處分惟貪墨欠賦及違限錯擬等
其百姓失所地方未治並無處分請

敕議如百姓困苦流離田地拋棄地方毫無治理者督撫
革職治罪部議從之十二月擢直隸巡撫八年四
月疏言各省設布政按察二使總理錢糧刑名直

隸以京畿獨不設惟八道員各管一府其圈地州縣以隣縣地撥補退出者分還各州縣不盡係一道管屬彼此牽混難稽至提解犯人隔界推諉會審參差臣查各省道員有屯田督糧驛傳全管通省例請于直隸八道中改設糧道巡道各一駐省城總理事歸畫一不致舛悞部議改直隸通薊道為總理錢穀守道霸昌道為總理刑名巡道駐保定府先是正定饑

上命賑濟至是期滿世德以各屬尚有饑民請再賑得

旨如所請十二年疏言直隸事務殷繁長蘆鹽政巡撫勢

難兼顧請仍差御史專理下部議行十四年請調

分防吳橋縣安陵東汎東光縣大龍灣汎千把總

各一馬兵四十步兵百十三防緝嚴鎮羊兒庄等

處私鹽從之十八年地震通州三河平谷香河武

清永清寶坻薊州固安等處世德分別被災輕重

請照分數蠲免錢糧如所請行十九年二月以疾

求罷

允之五月卒遺疏言直屬圈撥之餘民多貧乏災傷疊見
旗民雜處易有推避凡在外旗丁宜照屯村編定
名冊地方官稽查不使容留匪人口北各衛舊有
沙壓水衝地畝每歲額徵錢糧不多貧民實難賠
累望

特恩蠲免得

旨金世德簡任巡撫素以清慎實心任事著有勞績畿輔

重地正資料理溘焉病逝朕心深為憫惻應得卹典著
察例具奏餘令該部知之尋

賜祭葬如例謚清惠

耿昭忠

弟聚忠

耿昭忠漢軍正黃旗人耿繼茂次子幼隨父於鎮
所順治十一年繼茂奏遣長子精忠偕昭忠入侍
並授爵一等子

命以饒餘親王阿巴泰女孫妻昭忠封多羅額駙復晉秩

視和碩額駙加太子太保康熙十三年精忠等據福建反

詔拘某昭忠及其弟聚忠十四年

上念昭忠聚忠未與精忠同謀貫之復秩如舊十五年精忠歸順隨大軍剿海賊

詔授昭忠鎮平將軍駐福州代精忠理藩務十六年藩下

叅領徐鴻弼等首精忠歸順後尚蓄逆謀昭忠據

以

聞並指劾助逆曾養性等十餘人

上留疏於中十七年精忠還福州昭忠遵

旨携其祖父骸骨歸葬蓋平十九年八月昭忠疏劾精忠
謂前此徐鴻弼等首告罪狀皆實乞

敕法司勘治疏下廷議如所請逮訊精忠磔死籍沒昭忠
聚忠應連坐以其曾疏劾精忠予免議二十五年

正月昭忠卒

諭部議卹

賜祭葬如內大臣例謚曰勤僖聚忠者繼茂第三子順治十三年繼茂奏遣入侍尚公主封和碩額駙加太子太保康熙十四年奉

命招精忠降精忠拒不納仍齎

敕以歸後與昭忠同時疏劾精忠其畧曰逆賊耿精忠背

恩反叛臣等同氣法應連坐蒙

念及臣祖仲明臣父繼茂兩世微勞

特予寬貴

遣臣齋

敕招撫精忠豈知冥頑負固抗逆不悛臣等疾首痛心恨弗
食其肉辜

天威赫濯大兵入閩精忠力竭勢窮復戕害總督范承謨
暨其親屬數十人委積屍骸道路慘目當此魂遊
釜底猶然肆毒不休若使一隙可為更不知若何
螳逞尚遯

皇仁矜宥復爵如初顧蒙面偷生擁兵觀望泣思臣祖臣

父及精忠荷

三朝厚恩世授王爵雖捐糜頂踵難酬萬一乃精忠逆倫
肆志糾衆反戈臣母周氏哭阻不從逼致殞命且
誣臣祖與逆賊吳三桂在山海關時曾有成約是
不獨貽禍手足所弗顧即祖父亦視若仇讐忍心
賊陷臣念及此義不俱生今精忠將至

闕下乞

賜顯戮播告中外以為亂臣賊子戒疏入下法司議行尋

命聚忠赴福州密籌遷移藩兵事聚忠至福州以藩兵皆

可遷移覆奏稱

旨遂奉

詔携精忠家屬還京二十年同昭忠奏言家屬衆多艱于

養贍請如漢軍例披甲食糧部議如所請編為五
佐領歸隸正黃旗漢軍二十六年二月聚忠卒

諭部議卹與昭忠同謚曰愍敏

李林隆

李林隆漢軍正黃旗人父色稜授三等男順治十四年林隆襲康熙八年授鑲黃旗漢軍副都統尋兼佐領十三年逆藩吳三桂叛林隆隨大軍赴湖廣剿禦十五年川賊譚洪糾黨犯鄖陽順流而下泊陟嶺之琵琶灘陸路賊聯絡策應自鄖陽至均州糧道梗林隆偕提督楊茂勲佟國瑤分路夾攻擒賊將斬二百餘級焚其船獲偽劄器械無算糧道始通得

旨嘉獎十七年署河南提督二十九年大軍防禦噶爾丹
八旗漢軍都統等請每旗增火礮一於都統副都
統內遣一二人率將領軍校礮手送赴圖喇備用
奉

旨李林隆人材勇健練習軍務著提管火礮與副都統阿
南達偕往三十一年授陝西提督三十三年

命偕振武將軍孫思克會勘黃城免增設官兵事三十四
年

諭曰聞噶爾丹將從嘉峪關外過哈密之南昆都倫及額濟內河往投達賴喇嘛果爾此機斷不可失著副都統阿南達會同將軍博霖孫思克提督李林隆公議確探擇便以行李林隆可選本標兵二百名速往甘州商酌行事三十五年噶爾丹敗遁林隆奏請赴布隆吉爾偵緝奉

旨仍同阿南達往三十七年還京授鑲紅旗漢軍都統四十七年卒

賜祭葬如例

李輝祖

李輝祖漢軍正黃旗人父恒忠初以侍衛事

太宗文皇帝

賜名宜哈納授佐領尋陞叅領崇德八年隨鄭親王濟爾

哈朗征明克中後所前屯衛二城予雲騎尉世職

順治元年同都統葉臣征山西攻克太原汾州府

城及文水縣城三年隨肅親王豪格征四川敗流

賊楊薦兵於馬湖府五年擢本旗副都統六年同
都統巴顏駐師西安屢破流賊孫可望劉文炳康
薦宗等十一年同靖南將軍珠瑪喇征廣東敗李
定國兵於新會縣之山峪晉世職至一等輕車都
尉康熙十年卒第三子儀祖襲世職輝祖其長子
也初任佐領尋授兵部員外郎康熙十三年遷郎
中奉

命督理淮安關十九年遷貴州按察使二十一年陞湖北

布政使丁繼母憂歸服闋補四川布政使川賦舊
額九十餘萬張獻忠亂後田多荒蕪吳逆繼亂民
益寥寥輝祖勸諭流民開墾按地起徵生聚漸盛
舊例令州縣歲支帑銀採買白蠟解部輝祖以蜀
道險遠宜請戶部就近採買言於巡撫姚締虞遂
入奏得

旨停止三十一年陞太常寺卿尋遷大理寺卿三十四年

授河南巡撫三十五年

上親征噶爾丹輝祖奉

命辦理軍需尋擢湖廣總督三十七年軍需事竣始赴任
時湖南田賦不均輝祖奏請清釐改正令民自丈
而以官間為覆驗有不實者懲之以期事覈而民
不擾因疏劾偏沅巡撫楊鳳起于藩司任內承辦
賦冊今各屬出具並無不均印結草率造報鳳起
坐革職三十八年六月

上諭閣臣曰朕南巡浙江詢問地方米貴之由百姓皆謂

數年來湖廣米不至以致價值騰貴然楚省官吏並未
奏報水旱又聞湖南百姓甚苦皆由巡撫興永朝王樸
楊鳳起三人相繼擾害所致總督李輝祖為人誠實辦
事頗優但欲其不徇情面將從前廢弛整理斷斷不能
可召進京以侍郎用七月授刑部右侍郎先是吳逆偽
將軍黃明自康熙十九年大兵取柳州時竄入苗
峒至三十七年七月糾黨為亂茶陵州民陳丹書
譚廷玉等因知州趙國瑄私派銀兩擁衆入州城

刦奪印信倉庫與黃明糾結刦掠衡州官兵捕剿
先後就擒

上命戶部郎中剛五達等往鞫黃明等伏法知州趙國瑄
因私派激變陳丹書等擬罪如律輝祖以不據實
劾奏革職發往永定河工効力事竣給四品頂帶
四十一年卒祀四川名宦

楊琳

楊琳奉天鐵嶺衛人隸正黃旗漢軍康熙十八年

大軍征逆孽吳世璠琳以守備從征有功擢京營
遊擊旋遷叅將三十七年遷江南漕標副將三十
八年擢雲南臨安鎮總兵四十六年授鑲紅旗漢
軍副都統五十年擢福建陸路提督尋

命署福建將軍五十四年授廣東巡撫五十五年三月疏
言直隸各省俱有額設衛學獨廣東衛所未設請
廣州等處八衛二所文武童生各取進二名餘三
十六衛所各一名撥入各府學從之十月擢兩廣

總督五十七年碣石鎮總兵陳昂以西洋有和蘭
西一族兇狠異常且與澳門一種同派熟悉廣省
情形請令督撫關差諸臣設法防備輪流貿易不
許多船並集

上命琳詳查議奏琳疏言外國夷商利與中國貿易而懼
服有素數十年相安應聽如常請于夷船到後令
沿海文武官弁晝夜防衛從之又言廣東沿海地
方東界福建西界交趾諸番羅列素稱險要請於

沿海泊岸修築礮臺城垣設汛地營房分撥官兵
以靖海洋又言兩廣米資湖南販米必由永州府
經過奸民每借禁糶阻商不行請

敕湖南督撫查拿遏糶奸民治罪又條陳巡緝廣惠潮三
府沿海要地事宜一南澳為閩粵交界宜分路巡
查自南澳而西平海營而東為東路自大鵬營而
西廣海寨而東為中路自春江協而西龍門協而
東為西路今各總兵副將為統巡標員營員為分

巡每年輪班巡查一外洋戰船宜增撥巡哨請於
澄海協裁船漕船六增趕繒大船二於大鵬營內
撥艍船二歸澄海協春江協增趕繒大船二碣石
協改造艍船二庶巡船不缺一內河哨船宜酌量
勻設請裁順德等營內河哨船十八移設左翼鎮
標左右二營及新安營一水師要汛宜增兵守巡
請於督撫將軍提鎮等標二十營每營裁兵丁四
新會營裁把總二臣標右營裁把總一增入海門

達濠兩營以備守巡再海門營無額馬請裁達濠
營馬移海門營一濱海要地宜移駐文職潮州府
饒平縣屬之黃岡副將不便理民事請以潮州海
防同知移駐海陽縣屬之菴埠距縣遠以海陽縣
丞移駐一遠地協將宜屬鎮轄請以瓊州水師副
將歸瓊州總兵轄龍門水師副將歸高州總兵轄
諸疏俱下部議行五十八年

上以各省錢糧虧空多應設法清釐

命各督撫詳查議奏琳疏言州縣錢糧虧空由於侵隱挪移二弊今惟責成知府調取州縣流水比簿不時稽查隨收隨解毋存留縣庫一遇徵多解少立即揭報數少押令補解數多即行題叅虧空之弊可除部議從之又疏言廣東沿海險要修造礮臺城垣汎地百二十六處營房千三百八十間撥守官兵三千九百九十一名安礮位八百七請責成州縣不時查閱一有損壞捐俸修整下部議行五十

九年兩廣巡鹽御史昌保疏請將鹽課積欠交督撫兼管

上命琳兼兩廣鹽務六十年正月疏言廣西太平府思明土知州黃而芸貪殘不法叅革治罪請改土歸流所轄地方歸入太平府原設吏目一員仍留司捕務七月疏請兩廣商籍子弟照兩浙河東例歲科二試額進二十名均下部議行雍正元年三月奉旨入正黃旗四月疏言開平新會地方有盜首張祖珠等

糾衆掠開平之焦園村新會之禮步村瓦窖村已
遣兵役捕獲查向例盜案由州縣府司審解具題
或經部駁覆每二三年不結奸民得稽顙戮此案
請於臣等審明後即請

王命梟示再行具奏得

旨所奏甚是似此當行者一面奏聞一面即可舉行七月
疏陳稽察奸徒嚴禁海米完葺城郭三事

命與浙閩總督滿保酌行八月改兩廣總督為廣東總督

廣西總督

命琳為廣東總督二年正月

諭曰楊琳辦理鹽務以來錢糧雖然完納聞將窮民生理盡行霸佔百姓怨憤夫錢糧雖屬緊要當為百姓存留微利養生若既為錢糧起見又圖自己取利使窮民失所成羣竊盜其害較缺欠錢糧為大務須謹慎廉潔從公辦理方屬稱職不可祇為錢糧不顧百姓二月卒于

官

賜祭葬如例

田文鏡

田文鏡漢軍正黃旗人由監生於康熙二十二年
任福建長樂縣縣丞三十一年遷山西寧鄉縣知
縣四十四年遷直省易州知州四十五年内遷吏
部員外郎四十八年遷刑部郎中五十一年改授
監察御史五十五年巡視長蘆鹽政疏言山東塩
引節次請復尚缺額引五萬七千五百五十六道

今商人願先輸課增復原引自五十六年為始在
長清等縣運行奉

旨加引雖可增課恐于商人無益下九卿議奏行山東巡
撫定議具題如所請行五十六年擢內閣侍讀學
士雍正元年

上命告祭華嶽尋又

命往山西賑濟平定等四州縣九月署山西布政使二年
正月授河南布政使八月署河南巡撫奏言開封

府轄四州三十縣地方遼遠請照晉省改設直隸
州分轄開封府屬之西華商水項城沈邱四縣分
隸陳州臨潁襄城郛城長葛四縣分隸許州密新
鄭二縣分隸禹州滎澤滎陽河陰汜水四縣分隸
鄭州原武縣就近歸懷慶府轄延津縣歸衛輝府
轄又河南府屬之靈寶閿鄉二縣分隸陝州汝寧
府屬之光山息縣固始商城四縣分隸光州各縣
錢糧知州查核督催照知府例處分直隸各州錢

糧光州歸南汝道陳許禹鄭陝五州歸開歸道盤
查徇隱亦照知府例議處部議如所請行十二月
授河南巡撫三年正月奏言豫省河工向設堡夫
九百餘名修防嗣因連年水漲撥江南河兵千名
協力防護是河兵原以濟堡夫之不足河臣齊蘇
勒請遇秋汛裁堡夫竊思每年俱有水發時大堤
新築更須巡防新設河兵雖諳鑲墊釘椿捲埽下
埽而搜索狼窩鼠穴及風防雨守瞭望水勢不若

堡夫熟悉所有原設堡夫斷難裁汰六月又言堡夫學習椿埽湏責河員董率堡夫諳練即可拔河兵河兵雖有千把統轄應令管河道稽查并責各河同知教習庶可約束疏入俱下部議行是月又言豫省漕船向於衛輝水次受兌道經直隸大名府屬之濬滑內黃三縣隔省呼應不靈請將三縣改隸彰德衛輝統屬既專漕不致悞奉

旨允行四年九月奏言賦役法丁隨粮派請將豫省各邑

丁糧均派地糧內紳衿富戶不分等則一例輸將
於雍正五年為始部議從之十二月浙江道御史
謝濟世叅奏文鏡貪虐不法

諭責謝濟世自恃言官胸懷詭詐今大學士九卿等嚴訊
具奏訊得濟世自認風聞無據顯係受人指使要結朋
黨擾亂是非擬斬決疏入

諭大學士九卿等曰田文鏡於雍正元年告祭華山復命
時脩言山西荒歉情形朕以其直言無隱令往山西賑

濟即授為山西布政使剔除未清案件吏治一新嗣因河南諸事廢弛調為河南布政使旋即用為巡撫整飭河工每事秉公潔已實巡撫中第一今大學士九卿等究訊謝濟世所奏田文鏡各款皆虛則謝濟世受人指使情弊顯然謝濟世著即革職發往軍前効力贖罪姑免深究五年二月奏言黃河汎水長發素平易者忽成險工宜暫用民力每歲夏至後將距堤一二里村庄照佃戶數認夫有急赴工搶護工完立散若非計

日可竣者按名給工食河印汛弁各員不得擾民
閏三月又言河北彰德衛輝懷慶三府向設守道
一員康熙二十五年裁但三府共轄二十二縣幅
員甚廣請復設河北守道統轄加兵備職銜河北
堤工埽壩廳汛各員河兵堡夫一應錢糧令就近
督率并巡防小丹河等水利再衛輝府屬之胙城
縣地狹且離延津僅三十五里請裁併延津其學
額仍准附延津照舊考取部議均如所請行七月

特授河南總督加兵部尚書銜先是文鏡係正藍旗漢軍
是年奉

旨擡入正黃旗六年正月

諭曰田文鏡自到河南忠誠體國公正廉明豫省吏畏民
懷稱為樂土山東吏治民風宜加整飭著授田文鏡為
河東總督管理兩省事務此因人設立之曠典不為定
例七月奏言交界地方易藏匪類伏讀

上諭交界地方失事探寔贓盜處一面差役密拏一面移

文關會拏獲後報該管地方添差移解洵捕盜良法也
但捕役畏奸徒奪犯不敢越界密拏每因拒割致
成人命迨隣境關拏彼處仍復徇庇是以盜賊潛
聚請嗣後如隔屬密拏賊盜彼處有縱奪徇庇者
許拏盜之地方官詳本省督撫移咨會叅奉

旨允行時豫省漕糧惟附近水次之河北三府運本色其
不近水次之河以南州縣均徵折色仍在河北三
府採買三府偏累文鏡奏准各徵各漕將距水稍

遠州縣照舊徵本色臨水之儀封考城暨新改歸
豫省之濬滑內黃均增辦本色距水最遠之靈寶
減辦米二千石閿鄉減三千石歸臨水五縣徵輸
南陽汝寧二府光汝二州永寧嵩廬氏三縣皆路
遠難運勉其辦解即分撥五縣協辦程遠近每加
價銀五分至二錢三錢不等九月奏言東省倉庫
俱有虧空且多挪新掩舊請嗣後知府直隸州知
州離任時將所轄州縣倉庫錢糧照豫省交代例

限三個月令接任官查明出結如有虧空知府知
州均半賠結方許赴新任接任官徇情出結即令
分賠再府及直隸州倉庫向係該管道盤查嗣後
道員離任照此例交代又言東省錢糧舊欠二百
餘萬之多雍正六年錢糧將屆全完之期完不及
五分由於火耗太重私派太多其向民加派加耗
由於上司需索雖有自愛州縣不得不改廉易節
今欲禁加派加耗必先嚴禁收受陋規請

旨嚴諭山東撫藩二臣於半年內協同臣徹底查清分別
請叅應追應禁應革毋得瞻徇容隱諸疏入皆蒙

俞允七年七月遵

旨議奏山東青州府為適中要地內聯陸路各營外與沿
海營汛呼吸相通設立滿洲駐防兵可以資彈壓
而重保障府北城外舊有廢東陽古城址建城署營
房可駐兵數千議政王大臣議如所請行十月加
太子太保十二月奏請分東昌府屬之高唐州為

直隸州轄濟南府屬之禹城平原陵縣臨邑四縣
濮州為直隸州轄觀城范縣朝城三縣兗州府屬
之東平州為直隸州轄東阿平陰壽張陽穀四縣
青州府屬之莒州為直隸州轄日照沂水蒙陰三
縣從前所改之直隸濟寧州仍歸兗州府轄其濟
寧原轄之鉅野嘉祥縣改隸曹州鄆城縣仍隸兗
州下部議行八年二月奏言武弁養贍家口僕從
名糧外別無所資但給步糧不敷用請給提督至

守備馬步各半十提馬一步四把提馬一步三作為定額一體遵行從之五月

特命兼任北河總督十一月奏言今年豫省被水州縣收成雖不等實未成災士民踴躍輸將所有

特恩蠲免之錢糧請仍照額完兌部議應如所請得

旨士民急公奉上固屬可嘉著該督確查歉收分數仍照例蠲免即將現兌正糧作下年正供九年二月

上諭上年山東有水患河南亦有數縣被水朕以田文鏡

自能經理未另遣員查賑今聞祥符封邱等州縣有賣男女於山陝客商者田文鏡近來年老多病精神不及為屬員欺誑不能撫綏安插而但禁其賣鬻子女以避離散之名是絕其生路也豈為民父母者所忍言乎著刑部侍郎王國棟前往賑濟四月以病乞休

命解任來京調理七月病痊回任十年八月疏言登州鎮新增兵一千其中右二營請增千總一員把總一員約束下部議行十二月以病奏請解任

允之四月卒于河南遺疏上得

旨田文鏡老成歷練才守兼優自簡任督撫以來府庫不虧倉儲充足察吏安民懲貪除暴不避嫌怨庶務具舉封疆重寄正資料理前以衰病請解任調理勉從其請今聞溘逝深為憫惜應得卹典察例具奏尋

賜祭葬謚端肅

特命河南省城立專祠祀之並准入祀豫省賢良祠十三年十一月尚書史貽直奏稱河南開墾捐輸累民

甚宜速罷請

特簡庶明公正大臣往撫綏查核廷議如所請奉
旨河南地方自田文鏡為巡撫總督以來苛刻搜求以
嚴厲相尚而屬員又復承其意旨剝削成風豫民重
受其困即如前年匿災不報百姓至於流離蒙

皇考嚴飭遣官賑恤始得安全此中外所共知者乃王士
俊接任河東不能加意惠養且擾亂紛更以為幹濟
借開墾之虛名而成累民之弊政彼地方民風淳樸

竭蹶以從罔敢或後甚屬可嘉然先後遭督臣之苛政其情亦可憫矣王士俊著解任來京候旨並將此旨宣示豫民咸使知之乾隆五年四月河南巡撫雅爾圖奏言文鏡在豫百姓至今怨恨不應入豫省賢良祠奉

上諭朕觀雅爾圖此奏係見朕降旨令李衛入祀賢良意謂李衛與鄂爾泰素不相合特借田文鏡之應撤以見李衛之不應入耳當日王士俊將田文鏡奏請

入祀賢良係奉

皇考允行今若撤出是翻前案矣鄂爾泰田文鏡李衛皆
皇考所竄稱許者其實田文鏡不及李衛李衛又不及鄂
爾泰而彼時三人素不相合亦衆所共知也于是文
鏡仍得入豫省賢良祠

李繩武

李繩武漢軍正黃旗人祖鐸隨明南寧侯左夢庚
投誠授騎都尉世職父起龍襲隨征噶爾丹有功

加一雲騎尉康熙四十四年純武襲雍正元年四月授佐領十一月補叅領五年遷湖廣黃州副將八年擢甘肅寧夏提兵十年署固原提督乾隆元年調河南河北鎮總兵五月擢甘肅提督三年二月

命駐防哈密

賞治行裝銀五千兩三月調固原提督仍駐哈密先是雍正十三年

皇上御極噶爾丹策凌遣使乞和

詔撤北路兵乾隆三年以噶爾丹策凌遵

旨議定分界地方

允其遣使赴藏熬茶四年夷使至哈密軍營繩武撥兵

五百遣官協同理藩院章京由扁都口至東科爾

貿易畢護送至藏六年調甘肅提督七年以捏報

屯田濫邀議叙鐫二級

詔留任十年調西安提督十一年閏三月疏言商夷賚

木瑚里等帶牲畜乞在哈密貿易肅州鎮臣請於嘉峪關外花海子牧放查花海子逼近赤靖等處營汎南通青海北接北路卡倫留牧未便臣飭將馬駝貨物赴肅州牛羊暫牧哈密卡外俟價議定差員率商出口迎牧疏入報

聞六月疏言哈密西南西喇淖爾地通魯克察克闢展等處向設卡倫旋以水草不便議裁準夷多由是潛行應派兵守望又已達什為貝子玉富素牧廠

西北為烏拉臺卡倫北五十里有畢柳大板溝應
設卡與烏拉臺巴達什聲息相通可以嚴密防範
廷議允行十三年七月調甘肅提督十月調固原
提督十四年二月調直隸古北口提督四月調福
建陸路提督以病未赴十月調浙江提督十二月
調固原提督十五年授鎮海將軍十六年署安西
提督印務七月授甘肅提督十月調安西提督十
七年五月

諭曰李繩武奏此次準噶爾夷目額倫瑚里貿易牲畜貨物較十三年之數不無浮多再每次到哈密必有乏弱牲口求售應查明確數以理責問如果恭順懇求再行照例辦理等語此番交易係初次定例必當示之以信不可稍有遷就該夷貪狡無厭不過得尺進尺得寸進寸向來承辦員弁惟恐生事一味委曲周旋將就了事朝廷體制尊嚴邊疆奏事有不能盡實而外藩小國其上下之情轉相聯貫交易一事未

必不早為窺破一次踰例後次又復加增厚利所在
彼何樂而不為耶今該夷內亂又與哈薩克構釁其
交易較前所增有限已可得其情形此正辦理機會
總當悉遵前旨在三十年定數之內者許其截長補
短通融折算逾數者雖少亦緊駁回至奏報來使言
語情形務須一一據實倘稍有粉飾將來查出惟該
提督是問尋將夷目情形具奏

諭曰李繩武所奏竟似毫無主見姑為游移兩可之詞

以俟朕之批示如所稱該夷等似覺失望又不敢違
背章程其詞色深為作難止求轉奏等語又將夷人
伴送北山暫住牧放是已明示以據情入奏矣貿易
既定有章程自當永遠遵行若因其恭順畏懼而曲
為遷就將來勢必逐漸加增何所底止至疲弱馬駝
從前准其變售原屬辦理錯誤今既立定限制何得
因循故轍視為常例乎李繩武具摺奏請夷人必無
不知之理著即將入奏奉旨之處明白宣諭以哈密

貿易原屬非例今既新定規條當照十三年肅州貿易之例永遠遵守其疲乏牲畜不妨在哈密牧放回巢後携回必須如此辦理方可杜無厭之請在李繩武本非辦事果斷之才身為提督於此等重務一味周章觀望何以承受恩典著嚴行申飭六月
上以繩武於夷人貿易一事周章觀望毫無擔當

詔革職來京候旨十月署山東登州總兵十九年調陝西河州總兵二十一年擢安西提督閏九月授鎮

海將軍初和碩特汗沙克都爾曼濟率其部來降
駐牧巴里坤是年十二月叅贊大臣雅爾哈善疑
其有異志與繩武合疏言沙克都爾曼濟向內地
增卡倫偵探巴里坤布隆吉爾安西兵數與綽羅
斯叛黨扎納噶爾布通移游牧四十餘里迹可疑
臣等調滿洲綠旗兵分二隊抵賊游牧斬之復分
兵殲勒南山奎蘇博爾和津之厄魯特四千餘人
疏入下部議叙二十二年六月赴鎮海將軍任九

月卒

楊魁

楊魁漢軍正黃旗人曾祖廷耀山東巡撫祖秘四
川巡撫緣事降光祿寺少卿魁由監生捐通判補
福建泉州府通判以病回旗尋發江蘇以通判用
乾隆十九年借補昭文知縣調江寧縣二十四年
遷江寧府管糧同知三十年擢鎮江知府尋調揚
州府三十三年七月調常州府先是兩淮鹽政尤

拔世奏兩淮預行提引商人交息前任鹽政營私
侵蝕等弊

命江蘇巡撫彰寶嚴訊並以高恒晉福久任鹽務肆行
染指宜將高恒任內辦事之顧蓼懷分晰查究彰寶
等奏訊顧蓼懷代購貨物銀兩自認交高恒收尋
解京軍機大臣訊出蓼懷經手銀十五萬餘兩俱
係代商辦物知府楊魁等承審勒供繳高恒收
諭曰承審各官固不容代為掩飾亦豈容妄事深文楊

魁等必欲受意勒供致寔事反成虛捏是誠何心楊魁着解任質訊九月軍機大臣奏高恒令顧蓼懷向各商陸續支銀製物並非高恒盡行侵用亦非商人託辦顧蓼懷妄供已併案問擬楊魁訊無逼勒但不細詰殊屬疎忽應交部察議

上以楊魁等承審此案既無刑逼情事不復論其小過免議尋遷松太道三十六年遷安徽按察使三十七年擢布政使四十年調江西布政使四十一年擢

江蘇巡撫四十三年四月奏言江南營兵共千四百九十七名遇護送遣犯餉鞘及粘補軍裝器械均有必需之費向來朋扣銀兩除買補馬匹等項動用外餘俱報部酌撥並無需賞公項遇僉差事每於月領餉銀攤扣不免拮据查江陰縣有入官灘田三百二十三畝水草灘二千六百九十五畝現勘募民佃種陞科請將此項給兵承佃按則輸科收息以供僉差各費疏入報

聞九月葉爾羌辦事侍郎高樸家人赴蘇私賣玉石事

發

詔楊魁嚴拿並

諭曰高樸家人在蘇半載有餘肆行牟利衆所共知楊魁身任巡撫近在蘇州豈得委之毫無聞見乃竟任其骫法無忌一至于此寔不知其是何肺腑深負朕委任之恩封疆大臣遇此等重案尚敢徇私容隱將何事不可隱匿朕復何以用人乎況楊魁係漢軍世

僕由縣令用至巡撫乃敢昧良若此自揣當得何罪
著楊魁並將案內張名遠迅速嚴拿解京尋奏高樸
家人李福熊濂及張名遠即張鑾並於淮關蘇州
先後獲解

上以魁奉

旨後始將張鑾拿獲尚自稱嚴查確訪
諭嚴飭之尋以失察私玉過境及徐述夔悖逆詩案不
能寔心查辦先後經部議革任得

旨均寬免仍註冊十月奏言上元等三十四州縣並鎮江六衛幫被災分別輕重給賑酌借所需賑糧請概給折色於司庫正項撥給又各處災田應徵本年漕項銀米請分年帶徵其勘不成災地畝應徵新舊漕糧明冬帶辦下部議行十一月奏贛榆縣民韋昭首伊姪韋玉振為父刊行述語涉狂悖又寶山縣職員范起鳳控堂弟范起鎬串竊書籍並委員

赴查提究

上以所辦過當

諭曰徐述夔逆詞狂悖顯然是以捉犯解京命廷臣集訊定以大逆不道之罪今楊魁因前案之失意存惶惑遇有控首逆詞之案不論其事之輕重紛紛提訊株累多人自以為辦理認真而不知其過當以飾其前此不能查察徐述夔之罪夫韋玉振于伊父行述內叙其自免佃戶之租擅用赦字于理固不宜用但

此外並無悖逆之跡豈可因一赦字遂坐以大逆重罪乎至各處違碍書籍但經繳出其遲早原所不計若始終隱匿不交後經發覺即不能復為寬貸并當視其所藏之書係何等違碍以定罪名耳至此等控首之人不過挾制以快其私非實心尊君親上也設此後有首告逆案之人該督撫應悉心研鞫辨其真偽如虛仍當治以反坐之罪使奸頑知警不敢妄行若如楊魁所辦則怨家欲圖傾陷者片紙一投而被

告之身家已破拖累無辜成何政體且告許之風伊
于何底乎朕綜理庶務從不預存成見其情真罪當
必不稍事姑容其事屬虛誣者更不肯畧使屈抑楊
魁經朕簡用有年豈尚不能仰體朕意乎楊魁著交
部議處尋議降二級留任四十五年二月

上南巡

賞戴花翎

賜以詩曰久曾為府道上下習嫻知必不許趨奉更當

體溺饑於奢儉應示既養教母遺勗爾勤本務周忱
有往規四月調河南巡撫七月偕河道總督李奉翰
奏言黃河上游盛漲漫水墊陷考城五堡大堤幸
未掣動大溜現于溝西築挑水壩溝口築攔水壩
重重堵截並于五堡大堤兩頭趕築壩臺

諭令設有淹浸田廬妥為撫恤尋奏考城五堡外灘芝
麻庄壩工挂纜合龍

勅交部議叙十月丁憂四十六年正月署工部侍郎二

月

命往浙江海塘辦工七月同署巡撫陳輝祖奏言老鹽倉迤東柴工千七百丈潮汐衝激難資捍禦請改爲石塘于正項外賞銀二十萬兩以濟工需

詔如所議八月署福建巡撫十二月海澄縣民周鏗聲控在籍知縣葉廷推纂輯縣誌語涉狂悖魁訊係鏗聲挾嫌妄控仍請革廷推職審辦

諭曰葉廷推所載碑志勒用腐爛舊句原無悖逆之處

該撫自應將周鏗聲照誣告例問擬示懲又何必將
葉廷推革去職銜是欲兩敗俱傷轉使挾嫌妄控者
得長刀風而無辜良善致滋擾累楊魁並非不曉事
之人何茫無定見若此周鏗聲著即按律定擬葉廷
推等即行省釋無容究問四十七年三月奏言前督
臣三寶奏請臺灣照例報捐監穀脩儲今兩年餘
報捐甚少而臺灣漳泉府屬倉貯充足無藉收捐
請停臺灣捐監例從之尋以病解任回京五月道

卒

諭曰楊魁歷任巡撫有年頗著勤勞前聞患病即降旨令其回旗調理方冀速痊以資倚任今聞在途溘逝深為軫恤所有應得卹典著該部察例具奏尋

賜祭葬如例十月大學士公阿桂等訊陳輝祖籍沒王亶望貲財抽換案魁曾協同辦理請併籍其家產諭曰楊魁係差往查勘海塘查抄王亶望一案非其專辦陳輝祖抽換等弊自在楊魁前往閩省之後且伊

現已身故若將伊一併查抄未免過當朕不為此已
甚也

欽定八旗通志卷一百九十五

欽定四庫全書

欽定八旗通志卷一百九十六

人物志七十六

大臣傳六十二

漢軍正白旗一國柱宜永貴

和濟格爾馬
沈永忠徐大

貴

蔡士英

于時躍

趙祥星

孫思克

和濟格爾

子拜音達禮

和濟格爾本蒙古烏魯特人後隸正白旗漢軍遂

為何氏

太祖高皇帝天命七年征明取廣寧城和濟格爾時為明
千總隨守備石廷柱來降授叅領十一年從征巴
林部囊努克斬三人追獲叛逃蒙古又從征棟夔
俘獲甚衆

太宗文皇帝天聰三年從征明偵敵薊州斬哨卒三敵兵
三百來犯和濟格爾衝鋒入斬其把總一五年大
軍圍大凌河城明兵自錦州赴援和濟格爾先衆
斬敵明總兵祖大壽遣兵出城樵採且刦奪臺堡

並奮擊之生擒二人尋與敵戰城下我軍執纛者
墜于壕和濟格爾掖之出復以鳥鎗殪敵三人八
年予騎都尉世職崇德三年隨貝勒岳託征明至
山東屢擊敗敵兵四年始分漢軍為四旗以和濟
格爾為鑲白旗副都統五年隨大軍圍錦州禦擊
松山步兵杏山騎兵皆捷六年復圍錦州明總督
洪承疇率衆駐松山來犯者再和濟格爾俱擊卻
之敵自松山分據高橋南三臺和濟格爾以礮攻

克之殲百餘人七年復攻克塔山杏山二城敘功
加一雲騎尉是年分漢軍為八旗改正白旗副都
統兼任佐領八年隨鄭親王濟爾哈朗征明寧遠
攻克中後所前屯衛二城順治元年二月敘功晉
三等輕車都尉世襲罔替三年二月卒長子巴圖
襲職兼佐領遇

恩詔晉二等輕車都尉七年巴圖卒和濟格爾次子拜音
達禮襲職兼佐領康熙八年授叅領九年擢宣化

總兵官十三年七月調隨福建總兵官時逆藩
吳三桂陷湖南耿精忠據福建平南王尚可喜請
增兵駐防廣東拜音達禮與福建巡撫楊熙並奉
命駐廣州十五年二月可喜子之信糾衆據城拜音達
禮與楊熙議引所部出城會大軍擊賊之信已分
布叛黨閉城阻之拜音達禮控騎突前斬關奪門
出同楊熙率所部還會大軍於贛州疏述其事以

聞

上以其奮勇奪門忠貞可嘉下部議叙部議予軍功紀錄

一次復有

旨從優再議于是予雲騎尉職世襲罔替合所襲巴圖之

職為一等輕車都尉十九年授駐防廣州副都統

二十七年擢廣州將軍三十七年六月卒于官

賜祭葬如例以其子何天培襲職

馬國柱

馬國柱遼陽人隸正白旗漢軍

太宗文皇帝天聰八年

命禮部考取舉人國柱與選

賜衣一襲免四丁入直內院崇德三年授都察院理事官

順治元年大兵擊走流賊李自成大同代州歸順

授國柱山西巡撫自昌平出居庸關至代州任事

值都統葉臣巴哈納石廷柱等平忻州太原國柱

進駐太原策應大軍汾州平陽潞安澤州等府以

次底定賊黨李過高一功遁據綏德國柱疏請分

兵東西夾擊使賊首尾不能相應則一鼓可以成擒

上是其言二年二月疏薦明廢官巡撫張鵬雲苗胙土太僕寺卿王邦柱巡按陳昌言等並下部錄用六月陽曲土賊閻汝龍等糾衆剽掠國柱遣遊擊楊捷率兵往勦擒斬汝龍等復勦嵐縣土賊高九英招撫四十餘寨交城賊梁自雨河曲賊李俊等與九英互為犄角國柱亦遣將勦平之十月擢宣大總

督四年七月調江南江西河南總督五年正月安慶土賊馮洪圖陷巢縣掠無為州國柱飭按察使王國寶隨侍郎鄂屯率兵勦擊擒斬洪圖及其黨蔣懋修鍾武等是月江西總兵金聲桓據南昌叛賊將潘永禧突犯徽州國柱遣滿洲駐防官兵進擊賊衆奔潰復祁門黟縣

上命征南大將軍譚泰率師討聲桓九江南康饒州以次恢復時偽尚書余應桂據都昌出沒鄱陽湖國柱

遣副將楊捷等隨大軍以雲梯攻克都昌城擒應
桂斬之復擊敗賊黨鄧雲龍等于武寧十月廣東
叛鎮李成棟由南雄犯贛州國柱遣兵與巡撫劉
武元等會剿大敗其衆六年湖廣流賊王定安陷
羅田結連江南英山土賊陳元等謀犯霍山縣國
柱遣中軍副將朱運亨擊卻之三尖山檄總兵卜
從善剿白雲梅家英窠諸寨偽石城王朱統錡糾
賊五千餘由金紫寨赴援倚山列陣我兵奮力衝

擊斬獲無算連破賊寨擒偽總兵孔文燦偽副將
方學達等國柱復自率兵會提督巴山張大猷勦
六安州山賊先圍賊黨侯應龍于將軍寨迎擊賊
渠張福竄賊俱敗潰陣斬福竄應龍招降偽總兵
王俊偽副將藉維倫等諸賊寨俱燬滅先是明魯
王朱以海竄舟山其將吳凱據大蘭山助守國柱
奉

詔酌籌勦撫機宜知寧波貢生方聖時與其僉都嚴我公

為舊相識令赴以海處陳說利害我公遂投誠并獻招撫策國柱護送京師

上遣之齎

敕招撫國柱復寓書與凱至是凱偕諸舊將顧奇勲姜君獻陳德芝等繳敕印來降是年秋江南河南所屬州縣有雨雹傷稼者國柱請

勅撫按確勘分別蠲卹得

旨嗣後州縣遇有災傷督撫按即察明頃畝分數奏請蠲

卹勿泛奏候旨遲于察勘著為令國柱又疏言江南既改為省南京國子監宜改為江寧府學即其舊址新之仍支學田租銀以供祀事疏下部議從之七年遇

恩詔加太子少保九年七月福建賊渠張自盛竄入江西大覺巖國柱檄提督劉光弼會閩兵合勦陣斬偽總兵李全等自盛就擒十年五月蘇松巡按秦世楨疏請各省州縣賦課徑解布政司以杜勒索侵

那諸弊國柱疏言州縣錢糧由府解司所以察核完欠重郡守之責成請于解府之時府但編號記簿無庸拆封換批則勒索那移之弊可絕

詔如國柱所請行十一年正月海賊張名振屢犯崇明及劉河吳淞等地國柱增造戰艦募水師遣總兵王璟副將張思達等分兵夾擊敗賊于靖江又敗之于泰興燬賊船賊衆遠竄二月湖廣紅頭賊賴龍等據桂東犯江西國柱與湖廣總督祖澤遠會師

協勦直搗賊巢擒獲賴龍等是年遇察典加太子

太保九月以年老致仕康熙三年二月卒

賜祭葬如例祀江南山西名宦祠

宜永貴

子思孝孫廷輔

宜永貴遼陽人後隸正白旗漢軍

太宗文皇帝崇德五年永貴任佐領兼叅領隨睿親王多

爾袞圍明錦州以礮攻克涼馬山五里屯馬家湖

諸臺六年復圍錦州屢擊敗敵兵松山兵乘夜來

犯亦以礮卻之明總督洪承疇兵自松山分據高橋南三臺永貴攻克其臺斬百餘人七年錦州下鄭親王濟爾哈朗等移師攻取塔山杏山城永貴並用礮擊毀附近各臺及其城叙功予雲騎尉世職八年隨鄭親王攻克中後所前屯衛二城晉世職為騎都尉順治元年授兵部理事官二年隨豫親王多鐸追勦流賊李自成敗賊衆于潼關又從征江南攻取揚州四年考滿加一雲騎尉旋授臨

清總兵官六年朝城土賊杜全濮州土賊張文齊等分據臺堡刦掠城邑永貴率遊擊王政純曹如松等會集滿洲駐防大兵往朝城搜勦斬杜全及賊衆五百餘人隨移師濮州賊據土城以鎗礮拒戰我兵奮勇攻克殲賊四百餘人追獲張文齊斬之八年復入為兵部理事官九年擢正白旗漢軍副都統尋授總督倉場侍郎屢遇

恩詔晉世職至一等輕車都尉十年七月授南贛巡撫十

一年偽都督許勝可等擾瑞金永貴發兵會勦直
搗羅漢岩生擒勝可及其黨數百人斬以徇因疏
言羅漢岩地勢險僻往往為盜賊盤踞請移兵駐
任田寨就近彈壓十二年調福建巡撫十三年以
病瘵得

旨允解任代未至海賊鄭成功擁衆數十萬襲陷閩安鎮
及連江縣乘潮駕舸據烏龍江洪塘白沙諸要路
阻大兵聲援遂逼犯福州時定遠大將軍世子濟

度統師駐漳泉間提督馬得功率福州步騎勦賊
德化永春城中守兵僅數十永貴力疾登陴率布
政使王顯祚按察使鄭廷魁知府彭六翮駐防佐
領焦贊三格等並出原任按察使周亮工等于獄
集廝役及民間丁壯數百人分門固守令有馬者
伏城外截擊士卒數易衣幟更番出戰賊謂我兵
甚衆戰輒退久之悉衆來犯既豎梯我兵奮力禦
擊傷賊甚衆城垣屢為賊穿穴且毀應時堵塞完

固當賊之甫逼城也永貴以蠟書招馬得功為賊所阻踰月乃達得功由永福縣山路還援而大軍之在漳泉者亦至于是內外合擊斬賊萬餘人溺死者無算危城得全既受代永貴乃還京十六年起為安徽巡撫十八年四月以疾解任康熙四年復以年老辭世職乃予其孫廷輔襲六年十一月卒

賜祭葬如例子思孝任正白旗漢軍副都統十年疏請追

叙永貴福州全城功予騎都尉世職合前所得一
等輕車都尉為三等男思孝既卒仍以廷輔襲十
九年廷輔任叅領隨征南大將軍賚塔討逆賊吳
世璠由廣西進師擊敗偽將軍何繼祖等于黃草
壩二十年三月圍雲南城賊將胡國炳等率衆萬
餘出城拒戰廷輔率兵擊敗之賊平還京二十二
年卒二十五年追敘雲南軍功晉二等男子兆熊
有傳

沈永忠

從子瑞

沈永忠續順公沈志祥兄子崇德初志祥以明皮
島副將挈部衆來降隸漢軍正白旗永忠授爵至
三等男順治六年志祥卒無子永忠襲續順公爵
是年十月

命率領部衆駐濟南協同巡撫夏玉勦除土賊七年二月
授勦撫湖南將軍時李自成餘黨郝搖旗牛萬才
馬進忠等降于明桂王朱由榔永忠奉

詔移駐寶慶令總兵許天寵張國柱郝效忠等禦擊馬進
忠于靖州進勦郝搖旗于黎平皆奏捷復屢挫牛
萬才兵萬才納款復降其總兵曹應元副將劉芳
節及從官二百餘員兵民萬餘九年四月由榔將
李定國白文選等陷沅州武岡永忠在寶慶聞警
告急于定南王孔有德有德發兵赴援永忠不及
待退保湘潭七月遣兵禦賊永州聞桂林已陷乃
撤兵還長沙旋移駐岳州會敬謹親王尼堪奉

詔率兵至永忠請隨征自効王令居後策應十一月白文
選陷辰州總兵徐勇死之敬謹親王亦戰歿永忠
具疏請罪十年

上遣大學士洪承疇經畧軍務以永忠疏下承疇核議承
疇言武岡甫陷時永忠倡率竄遁致寶慶復為賊
據湖南士民至今嗟怨若仍任防勦衆心已離軍
威難振請令率舊部漢軍還京其隨征總兵許大
寵張國柱等及新將兵衆雖皆敗奔猶可募收後

效仍留湖南以資戰守

上從之十一年給事中魏裔介劾永忠貽誤封疆請治罪
定南王女四貞疏述其父殉難事謂因永忠告急
分桂林兵以援之永忠既棄寶慶又弗牒知援軍
還守要隘致桂林被陷疏並下王貝勒大臣議應
斬念其隨志祥投誠有功請免死削爵

詔如議以其從弟永興襲公爵叅領宋文科等因永興甫
三歲請以百八十甲仍屬永忠自備器械馬匹供

調遣並請量授官職得

旨予永忠子爵虛銜會都統郎賽奉

命駐防福建檄永興部衆隨往永忠疏請自効遂代永興
率所部赴福建十五年永忠疏劾叅領馬進功賊
欸進功亦許永忠侵尅軍餉事下都統巡撫會鞠
以永忠擅支軍鑲覆奏部議革銜罷任

上以永忠雖擅支與侵欺者有間

飭再議改罰歲俸降銜為男爵十七年授協鎮廣東將軍

永忠疏言臣自奉

命駐閩連年征勦臣弟永明臣子珣叅將張彥洪俱陣亡
今移鎮要地助理需人請以隨征之都督同知牛
萬才偕往尋萬才以不願隸永忠部下訴于總督
李率泰並許永忠貪虐狀率泰奏入

命靖南王耿繼茂覆核謂萬才所訴無據永忠馭之近刻
是以不願從行乃革萬才職留閩効力康熙元年
裁肇慶總兵官即以永忠駐肇慶三年碣石總兵

蘇利叛永忠率兵隨平南王尚可喜勦滅之四年
永忠以年老乞休部議令永興代領部衆駐潮州
九年永忠卒尋永興亦卒並

賜祭葬如例以永興兄子瑞襲爵仍駐潮州十三年逆藩
耿精忠據福建反潮州總兵劉進忠叛應之脅瑞
從逆瑞年甫十三與部下副都統張夢吉鄧廣明
叅領蘇雲龍徐彥龍佐領于國璉等謀拒之遣使
赴廣州告急先集兵擊賊巷戰三日進忠引賊黨

入城刦掠殺國璉驅瑞及家屬入閩行至詔安聞
可喜援兵至程鄉仍還潮州未幾進忠復逼廣明
部衆擁瑞赴漳浦羈留之夢吉乃收其部兵之半
歸廣州會海賊鄭錦侵據內地瑞居漳浦聲援阻
絕錦遂攜之至臺灣強授偽爵結婚姻十七年康
親王傑書請削瑞公爵其廣州舊部分徙于山西
諸省

上念瑞及部衆素無叛志

詔置勿論二十年大兵平福建將征臺灣瑞密遣人迎大
兵約為內應賊將朱友覺之瑞與從兄珽及家屬
並遇害大兵既取臺灣提督施琅入告下部議卹
仍予世襲續順公以瑞從子熊昭襲

徐大貴

徐大貴漢軍正白旗人

太宗文皇帝時任佐領兼工部理事官崇德五年隨大兵
圍錦州屢擊敗松山杏山敵兵是時明總督洪承

疇駐兵松山遣兵分據高橋南三臺大貴先衆攻
克之既而敵兵千餘乘夜犯我營大貴率衆禦擊
斬二十餘級七年攻克塔山杏山二城並有功予
雲騎尉世職八年隨鄭親王濟爾哈朗征明寧遠
取中後所前屯衛二城晉世職為騎都尉順治元
年正月擢正白旗漢軍副都統七月從征山西取
太原府追勦流賊李自成部衆入陝西境賊衆自
延安城內突出大貴領所部奮擊大敗之二年隨

豫親王多鐸平定河南江南叙功晉三等輕車都尉三年遷刑部侍郎仍兼副都統七年任駐防杭州左翼副都統九年八月隨平南將軍金礪移師福建勦海賊時賊酋鄭成功據海澄以衆二十餘萬寇漳州大貴與金礪督兵進擊殲賊三萬進攻海澄賊十萬餘扼隘拒戰且欲刦我紅衣礪大貴擊卻之連破賊壘先是三遇

恩詔晉世職至一等輕車都尉加一雲騎尉十二年叙擊

敗海賊功晉爵三等男十三年隨寧海大將軍伊爾德征舟山偽總制陳六御偽英毅伯阮思等率三萬衆戰艦二百餘迎犯我軍大貴統左翼軍擊敗之獲船二十有六軍械鎗礮無算賊棄舟山遁十四年引疾乞休

命加太子少保致仕尋叙復舟山功晉爵二等男康熙十八年十一月卒

賜祭葬如例諡勤果以其孫永泰襲爵子治都別有傳

蔡士英

蔡士英漢軍正白旗人初為明守備

太宗文皇帝崇德七年鄭親王濟爾哈朗征明克錦州士英隨明總兵祖大壽來降順治元年二月叙錄降將授佐領尋署叅領六月隨都統石廷柱征山東遇饒陽土賊掃地王康玉環擁衆萬餘阻道勦平之擒斬玉環尋隨都統葉臣招撫山西以紅衣礮攻太原府敗偽伯陳永福兵二年隨英親王阿濟

格征陝西擊敗流賊于延安府城下隨貝勒博洛
征浙江進定福建五年授都察院左僉都御史遷
副都御史六年任正白旗漢軍副都統隨巽親王
滿達海征叛鎮姜瓖復朔州及汾州府城九年四
月授江西巡撫時廣西土賊楊文等集浙閩流亡
據九仙山肆掠旁邑袁州吉安土賊劉京李文斌
受明桂王朱由榔侯爵糾衆陷安福永新諸縣士
英至與提督劉光弼會商援勦遣遊擊岑應元等

率師擊敗賊衆復安福永新李文斌劉京先後擒斬遂遣叅將陳陞等會同浙江官兵攻破九仙山賊寨楊文中破死降其弟楊富等餘衆並受撫又偽總兵霍武結連福建逆寇周立滋擾江西偽都督曹志攀偽總兵汪文生先後糾賊犯饒州廣信士英檄兵征勦復遣湖東道安煥通判張羽明等諭降之先是江西巡撫夏一鶚請豁荒田稅糧部議令覆加察核至是士英疏言江右連年兵燹加

以天災流行死亡相枕腴產拋荒前撫臣夏一鶚
疏報全省荒數及今覆察為數較多前此因地為
賊據令始恢復或民徙他鄉令始歸來有闔門遭
戮開報無人者又有誤聽訛傳恐報荒即作官田
者竟有未報之數臣思有荒而不除除之而不盡
非所以廣布

皇仁今十三郡所屬尚多寇盜良民甘心相從正以今日
歸來明日即追徵荒逋故寧從賊而不悔耳且貪

官汙吏因荒熟未分始則借荒為口寔繼則緣荒而作奸牽混不清窮民徒受催科之苦究無補于國用朝廷亦何樂有紙上之虛數哉惟除荒一舉不過減有名無實之賦額自此按冊而徵無所託詞再督勸開墾遵例起科數年之後可以仍完原額臣委官遍行踏勘通省荒蕪確數實十萬七千五百餘頃較前撫臣所報多二萬五千六十七畝有奇伏乞

恩准豁除庶國計民生兩有攸賴疏入得

旨允行又江西右布政使莊應會奏袁州瑞州二府科糧
獨重請減浮額下士英確勘疏言袁瑞多山素稱
瘠土自陳友諒竊據時因饟絀借徵明洪武初奸
民黎伯安抱冊以獻沿襲不改較元至治間額徵
浮倍視臨江吉安等府亦輕重懸殊應減從原額
每畝九升三合起科以蘇積困奉

旨浮糧積久重困一方應從原額減免毋踵弊混徵士英

又因工部議令察勘廣信府之封景山可否採木
疏言封景山初名銅塘因其峭險屢為盜藪削平
之後即封禁故亦稱封禁山唐代黃巢倡亂其黨
藉為窟穴流毒一方明嘉靖間奸民葉宗留賃居
燒炭遂謀為不軌鄧茂七為之附援三省搖動幾
危信州邇為山賊楊文竊踞寧謐未久恐啟奸謀
請

敕禁開採

詔從之十二年擢漕運總督明年疏言舊例本省丁船協運他省糧務未免稽延請改撥就近官丁領兌又言海州先遭兵火致多無主荒田已入新墾冊報原額正供錢糧無憑徵解請

旨豁除並刊正賦役全書以示久遠事皆下部議行十四年因病解任十六年病痊復授漕運總督先是順治二年設鳳陽巡撫駐泰州六年因標兵調赴廣西裁巡撫歸漕運總督管理至是士英以海防漕

務勢難兼理請仍舊制于是復設鳳陽巡撫士英
崇理漕務十八年以疾致仕康熙十三年正月卒
賜祭塋如典禮諡襄敏祀江西名宦淮安士民亦建祠祀
之四十四年

聖祖仁皇帝南巡過淮安

御書奏績東南以額其祠子毓榮別有傳

于時躍

于時躍廣寧人隸正白旗漢軍順治二年以生員

授合肥令尋遷懷慶府知府四年擢分守河南道
值靈寶盧氏二縣土賊劉芳張進澤張三桂等嘯
聚剽掠時躍同副將寇徽音遊擊孔國養入山搜
勦連破賊寨馘其渠餘黨盡平七年遷陝西按察
使九年擢山西布政使尋以陝西藍田縣知縣楊
行健為巡按高爾位劾罷時躍坐薦舉失當部議
降二級經畧洪承疇薦其才得

旨赴軍前効用十一年又以承疇請補湖廣驛鹽道十二

年正月超擢廣西巡撫時流賊張獻忠餘黨孫可望李定國等降附明桂王朱由榔據貴州雲南十二月明裔朱盛濃偕其弟盛添聚衆富川勾連土賊王心蔣乾相等及瑤獞肆行剽掠時躍會提督線國安總兵全節等進勦陣擒盛濃盛添斬賊無算寨悉平十三年由榔將義寧伯龍韜據柳州結可望為寇時躍密移提督線國安定南王護衛李茹春與投誠總兵溫如珍等會勦陣斬韜其餘衆

皆潰遁十四年冬可望與定國相攻不勝率所部
來降定國隨朱由榔竄入雲南

詔大兵由湖南四川廣西三路分進時躍疏言廣西大兵
由柳州慶遠進發則賓州逼近南寧太平宜設重
兵防守而柳州亦宜屯兵以策應疏下所司議行
時朱由榔之餘將尚擁衆寇掠鬱林則李勝李喬
華懷集則何奎豹李盛功富川賀縣則馬寶梁忠
南寧太平則賀九義曹友並據險為巢侵犯城邑

獐賊羅法達廖仁倫等復掠臨桂永福荔浦修仁等縣時躍親督將弁勦撫所陷城邑次第克復十七年叙功加都察院副都御史十八年擢廣西總督偽德陽王朱至濬竄入安南時躍遣守備袁文舉夏仲英至安南招撫至濬率衆投誠叙功加時躍右都御史康熙二年十月卒于官

賜祭葬如例祀廣西名宦祠

趙祥星

趙祥星漢軍正白旗人順治五年由貢生授山西
趙城縣知縣再任直隸任縣十三年十一月行取
奉

旨以御史用十四年補福建道監察御史巡視中城十五
年二月

命巡察會試外場疏言考試第一場以四書文為重乞

皇上欽定三題密封發內簾其餘諸題仍令考官照舊擬
出庶關節難通弊端盡塞部議從之十月巡按湖

南十六年八月疏言衡陽等州縣衛自順治十一年至十五年一切透支挪移欸項造冊咨部覆核應即嚴追其現存倉庫銀米責令起解庶官吏知儆軍需有賴十一月疏言寶慶府之武岡州與靖州之綏寧通道二縣皆山多嶺險地近徭苗現在汛防乏人請于中右兩路或寶慶協及沅州鎮標撥兵分防實未雨綢繆之急務均下所司議行十七年七月差滿考核計清釐挪移等項銀四萬八

千餘兩墾荒田三千九十餘頃奉

旨趙祥星准回道管事十月掌山東道監察御史十八年
二月疏言輦轂下綱紀肅清而棍徒招搖生事應
責司坊官挨戶稽查並設循環簿朔望赴五城御
史查驗以杜奸宄得

旨京城重大之地惡棍挾詐官民肆行擾害殊屬可惡以
後實係光棍俱照強盜例治罪餘如所奏康熙元年正
月疏言江南省上江下江學道二員湖廣省湖北

湖南學道二員應裁併歸一部議如所請是年巡視兩浙鹽政二年八月任滿回京授工科給事中洊遷順天府府丞十二年六月遷通政司右通政八月轉左通政尋遷大理寺卿十一月擢山東巡撫時軍興需費祥星以暫裁通省存留支給等銀二十餘萬兩充餉先後具奏均奉

旨嘉獎議授為兵部右侍郎祥星又清釐山東隱漏地畝四萬一千餘頃照例起科議授兵部尚書晉正一

品銜俱仍留巡撫任十七年五月署山東提督十八年正月疏言去歲雨澤愆期秋成歉薄除現在賑濟外請將常平倉穀贖緩動支接賑得

旨允之三月自陳議以不謹應革職奉

旨趙祥星著革職仍留原任七月

上諭應行應革事宜著部院科道及各督撫條奏吏科給事中李宗孔等疏叅祥星已經議革仍留原任豈能損改前非請即予處分奉

旨着解任三十二年六月卒

孫思克

孫思克漢軍正白旗人三等男孫得功次子初任王府護衛順治八年二月管佐領六月授刑部理事官十一年六月遷叅領十三年考滿廕一子入監尋隨大軍由湖南進征貴州雲南屢立戰功康熙二年正月擢甘肅總兵官五年三月同提督張勇疏言厄魯特蒙古僻處海隅雖通西藏亦荒徼

絕塞非有肥饒地土資生

朝廷曲示招徠准開市口貿易且以境內數十萬之
番族令每年輸納駝馬牛羊與彼為厄魯特蒙古
者理應感戴

皇仁鈴束部落各安邊境乃墨爾根台吉等狼心不改鷹
眼未化蟻聚蜂屯于祁連山上縱牧內地之大草
灘去冬不遵撫諭抗拒于定羌廟為官兵擊退稍
挫其鋒猶不悛改狂肆愈盛聲言糾合部落三道

分肥一入河州臨洮鞏昌一逼西寧一犯涼州狡
謀叵測宜迅速創懲方可議修築而嚴固守得

旨下廷臣密議以兵端不可輕動令嚴防邊境仍撫恤番
人以和其心于是思克偕張勇修築邊牆自肅都
口西水關至嘉峪關六年八月內地住牧黃城兒
大草灘之厄魯特蒙古盡數徙去思克至南山各
隘相度衝險撥兵固禦總督盧崇峻疏

聞下部知之十三年六月

諭獎効力邊疆有年下部議加銜右都督是冬平涼提督
王輔臣叛應吳三桂臨鞏諸郡相繼從逆蘭州危
急思克遣遊擊劉衍等移兵協防自統兵進次苦
水會蘭州失守乃駐河西尋回涼州十四年五月
疏言前因督臣哈占定議南北兩路兵同時進勦
將軍張勇總兵王進寶等從金城關渡河規復蘭
州臣自涼州領標兵由阿壩紅水蘆塘索橋人跡
不到之草地結筏渡河規復靖遠一路幸賴

天威遐播靖遠周圍三百里城堡皆已納款正擬趨固原
會大兵于平涼不料西海蒙古墨爾根台吉等已
從山口入內地與官兵拒敵副將陳達陣亡臣留
叅將劉選勝等守靖遠由草地渡河回涼以保河
西根本重地墨爾根台吉引衆出口而甘州所屬
之高臺與紅崖梨園等堡有黃番頭目入口劫掠
合數千餘騎攻圍暖泉順德諸堡臣即自涼赴甘
番族乃遠竄因將軍張勇約期會剿王輔臣復渡

河而東由草地往來兵丁勞苦十倍他鎮乞

恩加犒賞得

旨往來防勦具見忠蓋兵丁各加犒賞閏五月同張勇等
圍鞏昌時定西大將軍貝勒洞鄂圍秦州城中賊
屢出犯其逆黨自四川至者結寨秦州南山上益
猖獗洞鄂檄思克率兵二千駐秦州西賊勢乃窘
偽總兵陳萬策偽道馬肇升赴思克營乞降偽總
兵巴三綱遁遂復秦州南山賊潰竄思克同振武

將軍佛尼勒等追擊于閭闕敗之乘勝克禮縣復
敗賊于西和奪門入斬偽官三十清水伏羌等縣
皆復仍赴鞏昌會勦遣降將陳萬策等入城曉諭
偽道陳台孫總兵陳可等以鞏昌十七州縣降河
東悉定八月會勦平涼思克由靜寧隆德進擊走
賊將李國樑陣斬賊兵五百餘生擒偽守備一千
總二復靜寧州進次華亭偽副將高鼎率將弁二
十八兵千餘迎降遂抵平涼與大軍合十五年三

月貝勒洞鄂奏言大軍圍平涼半載賊屢出犯思
克標兵徒步當先敗賊于南山者四敗偽總兵蔡
元于城北者四又九處設伏敗賊于南門賊別將
來襲掘壕軍思克揮兵急擊賊退復逼者三俱敗
之勦涇州白起寨偽將李茂思克先至寨下遣領
旗李錦先登擒李茂斬賊數十又敗賊于南山甲
子峪及馬營子麻布嶺宜酌示鼓勵紀功叙錄五
月隨撫遠大將軍圖海破賊于虎山墩王輔臣窮

感乞降思克還涼州八月

諭部臣曰自逆賊變亂以來奸徒附和侵擾地方大兵未集人心不無動搖張勇王進寶孫思克一聞蘭州之變即率兵勦殺賊衆收復城邑其功甚大及大兵攻取平涼復同心協力展布謀猷兼以訓練士卒忠義素孚故能身先行陣所向克捷朕甚嘉之于軍功議叙之外應從優加恩孫思克陞為涼州提督並授一等輕車都尉世職十月疏言全秦底定仰仗

天威臣何功可錄蒙

皇上溢格優陞復授世職臣即粉身碎骨萬不敢辭今歲
虎山墩之戰隨大將軍圖海相度地形并偵通固
原路徑賊伏兵萬餘猝起來犯臣率領隊兵奮戰
追擊十餘里雖敗賊衆而賊刀斫臣右臂傷筋及
骨迄今五閱月已成殘疾乞解任回旗得

旨卿久鎮巖疆勦除賊寇奮勇克敵屢建戰功新簡提督
正資料理不必求罷十六年四月彙叙前後軍功晉三

等男時噶爾丹侵西北諸蒙古其濟農等為所敗
突入邊塞擾居民思克同張勇以兵逐之乃徙去
十八年七月

上敕圖海調思克與提督趙良棟等勦賊漢中興安圖海
奏九月初旬四路進發思克與將軍畢力克圖由
畧陽進會有

詔因京師地震令內外大臣各抒所見思克疏言漢中興
安皆重山疊嶺勢險路紆逆賊盤踞有年又創斷

各路要口我兵未能長驅直入賊兵爬山越嶺如履平地稔知小路曲徑潛躡我後以絕餉道為害滋甚大將軍圖海定議四路進兵雖分賊勢終憂兵單綠旗兵每人止有一馬常需馱載甲冑器械馬料不足羸瘦甚多步兵背負棉甲乾糧不皆強壯惟滿洲勁旅堪恃第為數亦無多若各路調取又恐秦省三邊地逼番夷秋高馬肥乘機思逞不若令秋暫緩進兵揀選各營強壯飼秣馬匹俟來

春二三月間塞外草尚未生水泉尚涸番夷不敢
內犯之時多調邊兵以資戰守秦地大半皆山土
瘠民貧不產秔稻所種惟麥豆之屬向有捐納一
項稍裨軍需今已停止專事採買用民負載馱運
雇賃之價數倍於應輸之賦各路需餉甚多山逕
狹隘輓運維艱或照向年捐例轉輸協濟亦宜緩
期熟計俾士馬得以飽騰況八旗出征官兵聞京
師地震傾壞房屋壓斃人口各有內顧之憂俟來

春人心稍定兵糧俱足再議進兵未晚疏入

上命學士拉薩禮至涼州宣

諭詰問曰陝西綠旗兵較之各省擲推精銳賊能跋涉山
嶺我兵何獨不能漢中興安久為內地滿漢大兵經行
熟悉孫思克何得視同絕域荒誕其辭凡將帥用兵前
為衝鋒後顧餉道自有一定機宜倘以賊潛斷餉道為
憂怯懦不前則永無破賊之日矣各省綠旗兵皆止給
一馬越境征勦粵東粵西閩楚諸處今又進定滇黔較

之平定境內漢興勞逸何如耶凡將軍提鎮募兵時必
選精壯毋得濫收充數定例嚴明如果兵非強壯難以
應用則孫思克平日所司何事滿洲兵在陝西者亦不
少且有將軍圖海籌畫周詳何得妄稱單弱正值秋
成涼爽各處賊寇大敗震驚之餘不速行平蕩反欲於
來春青黃不接之時進取設或二三月間進取之後四
五月間番夷馬肥思逞又將若之何粵東粵西山嶺亦
多何曾豫備糧餉官兵豈有止食稻米不食他粟之理

陝西數年以來未曾勞民轉運漢興雖多險阻非隔省可比今恐輓運累民來春又誰為輓運耶當逆賊敗遁之時急令進兵者正為早定地方以安百姓耳今以輓運維艱請開事例為詞其規避進兵明甚八旗官兵世受渥恩不特房屋傾圯無足重輕即赴湯蹈火誼亦難辭何得妄言人情憂慮孫思克封疆大臣前者陝西境內淪陷即應議處念同大軍進勦宥過計功加不次之擢給世襲之官當捐軀報國自請破賊安疆乃身任提

督統轄全師不思奮力前進反煽惑人心飾辭妄奏深負朕恩速行詰取供詞思克乃自引罪拉薩禮還奏得旨俟事平日再議十一月思克與畢力克圖擊敗賊衆於

階州文縣成縣進駐沔縣

詔思克還涼州尋以總督哈占請移駐莊浪防守河東河

西二十年三月慶陽賊渠耿飛倡亂糾叛番達爾

嘉濟農等犯河州思克與張勇勦平之二十二年

四月追論前奏緩進兵罪革三等男爵及提督仍

留總兵任二十三年六月遷甘肅提督二十八年
三月北套生番犯內地掠錫喇偉古爾番族思克
遣兵截阻斬獲甚衆二十九年十一月出使西域
之學士達瑚郎中桑格歸至嘉峪關外為西海阿
奇羅卜藏所劫思克聞報即遣遊擊朱應祥計賺
其宰桑質於關內始反我使臣別遣副將潘育龍
遊擊韓成等搗其巢穴斬馘四百餘阿奇羅卜藏
遁復遣人赴西海詰問各台吉責償所掠物各台

吉懼罄阿奇羅卜藏所有以償思克奏請免其窮

治

諭嘉盡心籌畫區處合宜如所請行三十年二月疏言肅
州協去甘州五百里去涼州一千里極邊之地外
逼西海北套哈密諸部內則蕃族插帳與民雜處
噶爾丹巢穴離邊月餘程其姪策妄阿喇布坦現
在西套住牧雖叔姪為讎恐將來復合有侵奪西
海之舉嘉峪關外係其必由之路所設副將威望

不尊兵馬不滿一千不足以資控禦調兵接應緩
不濟急不可不作先事未然之防請設總兵一員
兵三千以固邊圉庶可漸消窺伺又甘肅地瘠民
貧一切布種收穫與腹地迥別一年一收縱遇豐
年輸將國賦之外僅贍八口並無蓋藏本地兵馬
糧料不敷供支節年折價已苦無處糴買萬一徵
調雲屯何以接濟宜於河西要地屯積糧草以備
戰守但本地無糧可買輓運又恐勞民惟捐輸是

賴而本地富庶之家有限請無論本省別省官民
一例捐納加級紀錄職監俟邊儲稍充即行停止
下九卿議從之三十一年三月加太子少保予騎
都尉世職五月疏報遣總兵潘育龍等追來降復
叛之番衆于庫列圖嶺擒之請將叛首奇齊克正
法宥其從人妻子解京

上免奇齊克死令安插內地十一月乞休

優旨慰留加振武將軍銜三十二年二月

命內大臣郎坦領京營兵至寧夏同思克駐防即以思克
為叅贊探噶爾丹聲息三十三年正月疏報巴圖
爾額爾克濟農之弟博濟於三十年間叛逃復帶
部落窺邊經臣遣兵同總兵柯彩擊敗自其兄蒙
恩安插賀蘭山并以博濟被獲人口發往收養後頗知自
悔前罪茲特率所屬男婦百餘來投

詔與巴圖爾額爾克濟農同住牧三十五年二月

上親征噶爾丹由中路

命撫遠大將軍費揚古由西路進思克率陝西兵出寧夏
至翁金與費揚古兵會五月

上駐蹕克魯倫河噶爾丹聞

駕親臨倉皇遁去費揚古邀擊之昭莫多令思克率綠旗
兵居中與東西二軍并力迎擊斬獲無算追逐三
十餘里噶爾丹引數騎遠竄捷奏至奉

諭褒獎

召赴京

命侍衛迎勞

賜袍褂帽靴等物並

御製詩笺有鷹揚資遠畧宿望在西陲之句入

覲暢春園

賜

御書綏懷堂額及端罩四團龍補服孔雀翎朝帽朝衣朝

珠鞍馬並給隨帶官兵糧料

命赴肅州駐兵探噶爾丹往哈密聲息三十七年叙昭莫

多戰功加給雲騎尉三十九年二月以病乞休

遣御醫及兵部官往視仍

命留任調養是月卒

詔從優議卹贈太子太保

賜祭葬諡襄武七月櫬還

命皇長子前往奠醊


賜鞍馬二銀千兩

諭廷臣曰聞孫思克喪回時自甘州至潼關沿途軍民無

不號泣相送若平昔居官不善何以得此誠可謂將軍
矣復

諭兵部曰孫思克謀勇素裕居官甚優久鎮嚴疆允稱良
將給還前所革世職部議并為一等男加一雲騎尉以
其子承運襲雍正十年入祀賢良祠乾隆三十二
年以思克當吳三桂反叛及噶爾丹犯邊時懋著
勞績其一等男爵

詔予世襲罔替



欽定八旗通志卷一百九十六